

समे – 12:25 hrs.

<><><><><><>

Delhi CM

रेखा गुप्ता होर अज्ज दिल्ली दी नमी मुख्यमंत्री दे तौर पर सगंध लैडन। कल नमी दिल्ली च दिल्ली भाजपा विधायक दल दी बैठक मगरा नमें मुखमंत्री दे तौर पर उन्दे नां दी घोषणा कीती गई। मगरा शामी रेखा गुप्ता होरें उपराज्यपाल विनय कुमार सक्सेना हुन्दे कन्ने मलाटी कीती ते नमी सरकार बनाने दा दावा पेश कीता। सक्सेना होरें दावा स्वीकार करदे होई उनें गी नमी सरकार बनाने आस्तै साददा दिता। उपराज्यपाल होर हुनै कोला किश चिर मगरा 12 बजिरे 35 मिनट पर उनेंगी औहदे ते राजदारी दी सगंध दौआडन। प्रधानमंत्री नरेंद्र मोदी, गृह मंत्री अमित शाह ते रक्षा मंत्री राजनाथ सिंह हुंदे बी इस समारोह च शामिल होने लेई आए देन। इस कार्यक्रम लेई कोई करीब 20 राज्यें दे मुखमंत्रियें ते उपमुखमंत्रियें गी बी साददा दिता गेदा ऐ।

<><><><><><>

COSA-J&K Situation

सेना प्रमुख उपेंद्र द्रविंदी होरें आखेआ ऐ जे 2014 कोला लेइयै भारत पाकिस्तान कन्ने नियंत्रण रेखा बारै साफ स्पष्ट तौरा पर गल्ल करदा आवा'रदा ऐ ते बन्ने पारा कुसै बी चाल्ली दी शरारत दा पूरी तगड़ेयाई कन्ने बनकदा परता दिंदा ऐ। उनें आखेआ जे अगस्त 2019 च दफा 370 दे हट्टने दे बाद आतंकवादिएं दी गिनतरी ते मकामी नौजवानें दे आतंकवाद च शामिल होने च खरी मती कमी आई ऐ ते लोकें दी अपनी पंछान गी लेइए बेजकीनी पूरी चाल्ली खत्म होई चुकी दी ऐ। इस समाचार एजेंसी कन्ने गल्ल करदे होई सेना प्रमुख होरें आखेआ जे 370 दे ढाए जाने दे बाद संगठन कोला बाहर रेइयै आतंकवादिएं दी मदद करने आहले ओवर ग्राउंड वर्करें आहला मुद्दा बी हून खत्म होई चुके दा ऐ। उनें आखेआ जे सुरक्षाबलें दे सांझे जत्नें दी बदौलत कश्मीर गी आतंकवाद कोला सैलसफा आहली बक्खी नमी दिशा देई दिती गेदी ऐ।

<><><><><><>

J&K-Quarantine

राजौरी जिले दा बडाल ग्रांस जित्थे पिछले दिसंबर ते जनवरी महीने दौरान कुसै अंजान बमारी कारण 17 लोकें दी मौत होई गई ही ते मगरा ग्रांस खाली कराइए लोकें गी दुई थाहरें लेजाया गेदा हा, उत्थे 13 लोकें दा खीरी जत्था बी कल ग्रांस परतोई आया ऐ। लोकें दी मौत दी अस्सल वजह अजें बी पता नेई लग्गी सकी ऐ, पर माहिरें दा एह मनना ऐ जे उंदे खाने-पीने च neurotoxin जानी इक किस्मै दा जैहर एहदी वजह होई सकदा ऐ। ग्रांस खाली करियै होरनें थाहरें रक्खे गेदे सब्भनें 395 बसनीकें गी वापस अपने घरें भेजी दिता गेदा ऐ।

<><><><><><>

Puducherry-Organ

पुदुचेरी सरकारै आखेआ ऐ जे अंगदान करने आहलें गी उंदे जीवन रक्षक योगदान दे सम्मान दे तौर पर राजकीय सम्मान दिता जाग। इस पैहल गी लागू करने आस्तै दिशा-निर्देश तैयार कीते गेन। सरकारै अस्पतालें गी निर्देश दिता ऐ जे ओह ब्रेन डेड मामलें बारै फौरी जिला कलेक्टरें ते

खेत्तरीय प्रशासकें गी जानकारी देयें। नमें दिशा-निर्देशें मूजब डी.सी ते खेत्तरीय प्रशासक अंगदान करने आहलें दे घर जाइए उनेंगी सम्मानित करंगन। एहदे अलावा गणतंत्र दिवस ते आजादी आहले ध्याड़े जनेह् मौकें पर उपराज्यपाल जां मुखमंत्रि अंगदान करने आहलें दे परौआरें गी साद्दा देंगन ते उनेंगी सार्वजनिक तौर पर सम्मानित करंगन।

<><><><><>

Jammu Smart City

जम्मू स्मार्ट सिटी लिमिटेड गी 100में SKOCH शिखर सम्मेलन च सुशासन आस्तै मन्ने-परमन्ने दे SKOCH पुरस्कार कन्ने सम्मानित कीता गेआ ऐ। एह पुरस्कार जम्मू स्मार्ट सिटी लिमिटेड गी औहदा शासन च डिजिटल दा इस्तेमाल, बसनीकें गी सेवा उपलब्ध कराने ते कुशल सार्वजनिक सुविधाएं गी उपलब्ध कराने लेई दिता गेआ ऐ। जम्मू स्मार्ट सिटी लिमिटेड दे सी.ई.ओ डॉ. देवांश यादव होरें आखेआ जे पुरस्कार जम्मू स्मार्ट सिटी लिमिटेड दी पूरी टीम दे अनथक प्रयासें दा नतीजा ऐ।

<><><><><>

Aadhar-J&K

इंफार्मेशन टेकनालजी मैहकमे दे कमिशनर सैक्रेटरी सौरभ भगत होरें जंदे कल आधार बनाने ते ओहदे च नमियां जानकारीयां जोड़ने आहले पहलुएं बारें इक्क बैठक च जायजा लैता। मीटिंग च दस्सेआ गेआ जे जम्मू-कश्मीर Unique Identification authority of India दे सहयोग कन्ने सब्भने जिलें च नियमित रूप कन्ने आधार कैंप लांदा रौहंदा ऐ। एहदे कन्ने-कन्ने सत्यापित जन्म प्रमाण पतरें दा इस्तेमाल करियै नवजात शिशिएं आस्तै आधार बनाने दी सुविधा आस्तै अस्पतालें च बी आधार नामांकन सुविधा स्थापित कीती गेई ऐ।

<><><><><>

Mega-Job Fair Kathua

स्थानीय प्रतिमा ते उद्योग बिच्च बित्थ गी पूरने दे उद्देश्य कन्ने इक्क ऐतिहासिक पैहल च कठुआ जिला प्रशासन अपने सब्भनें शा बड़ें रोजगार मेले दे आयोजन आस्तै तैयार ऐ। एह मेला कल यानि 21 फरवरी गी आयोजित कीता जाग ते इस मेले च हुनरमंद ते पढ़े-लिखे दे नौजवानें गी 1 जहार कोला कम्म-रोजगार दे मौके उपलब्ध कराए जाडन। मेले च गोदरेज, वरुण बेवरेजज़, क्रीम बैल, जीवन बीमा निगम ते होर कई प्रमुख औद्योगिक इकाइयां शामिल होंगन। कठुआ जिले दे डिप्टी कमिशनर डॉ. राकेश मन्हास होरें मेले च थोने आहले रोजगार दे मौकें गी रेखांकित करदे होई आखेआ जे एह मेला कठुआ च होने आहला अपनी चाल्ली दा पैहला कार्यक्रम होग जेदे च बक्ख-बक्ख उद्योग इक्क जगह पर किट्ठे होइयै रोजगार दे मौके उपलब्ध कराडन।

<><><><><>

MGNREGA

ग्रामीण विकास ते पंचायती राज मैहकमे दे सचिव मोहम्मद एजाज असद होरें जंदे कल माली बरें 2025-26 लेई मनरेगा दी सलाना कार्ययोजना ते श्रम बजट दा जायजा लैता। इस जायजा बैठक च जम्मू सूबे दे 10 जिलें पर खासतौरा पर ध्यान केंद्रित कीता गेआ। बैठक च कई महत्वपूर्ण पहलुएं जिंदे च जियो टैगिंग, राष्ट्रीय मनरेगा योजना प्रबंधन बवस्था दा इस्तेमाल ते समेंबद्द ढंग्गै कन्ने तनखाएं दा भुगतान शामिल ऐ।

<><><><><>